

Diskursu Prezidente Repúblika Dr. José Ramos-Horta iha Enkontru Timor-Leste Development Partners Meeting (TLDPM)

“TOGETHER WE WORK TO RECOVER THE ECONOMY TOWARDS A RESILIENT SOCIETY”

=====

Sesta-feira, 10 Juñu 2022

Exelénsia,

Ba dahuluk liu, ha'u agradese ba Primeiru Ministru ba konvite ne'ebé mak diriji mai ha'u atu halo diskursu iha TLDPM no eloja ninia kolega ministerial no funsionáriu sira hodi organiza enkontru oportunu exellente ida-ne'e.

Ha'u hakarak hato'o ha'u-nia gratidaun ba parseiru dezenvolvimentu sira hotu, viziñu no la'ós viziñu, bo'ot no ki'ik, Sistema Nasaun Unidas, programa, fundus, ajénsia espesializada, ba kontinua apoia durante dékada rua no engajamentu ho ami-nia povu sira.

Nu'udar País illa, comunidade ki'ik, dalabarak ami sai vulneravel liu, laiha imunidade ba pandemia globál, funu ne'ebé hamosu katastrófe, funu intra-estadu no entre-estadu irrasional akontese iha fatin barak iha mundu, no rai-maran (bailoron naruk) ka inundasaun tanba Inan Natureza nia reasaun ba abuzu durante sékulu ba sékulu ne'ebé komete husi ema. Mudansa klimátiku kauza husi atividade umanu no pandemia globál ne'ebé espalla lalais hanesan mós ho ema ne'ebé halo vijajen iha mundu sempre to'o iha ita-nia rai.

Atinjimentu iha dékada rua ikus kona-ba eradikasaun pobreza globalmente reverte fali ba ema miliaun-ba-miliaun ne'ebé filafali ba pobreza iha mundu tomak, lakon sira-nia rendimentu tanba konfinamentu no interupsaun kadeia abastesimentu (supply chain). Traballadór labarik no eskravidau labarik aumenta exponensialmente.

Iha ne'ebé de'it ita lokaliza iha planeta ida-ne'e, ita sente impaktu husi katástrofe ne'ebé la'ós ita mak kria.

Exelénsia sira,

Ita-nia povu sira mós sente impaktu husi krizi globál oioin no ha'u preokupa karik aat liu ne'e sei mosu no ataka ema kiak sira-nia baraka ne'ebé miserável.

Maibé sempre iha naramon iha túnel nia rohan maske iha tempu ne'ebé nakukun loos bainhira ita hotu hamutuk iha vizaun nasionál ida no konkorda kona-ba meta ne'ebé bele implementa. Grande Opscoes do para 2023, Art. 30. Oferese pontudevista ampla kona-ba saida mak Governu propoin ba 2023 no tinan hirak tuirmai.

Ha'u fiar katak ita bele hetan prosperidade natoon liuhusi investe iha ekonomia matak no azúl ho turismu sustentavel baze iha comunidade, ne'ebé ninia atrasaun prinsipál la'ós de'it ita-nia rikusoin biodiversidade ne'ebé exesionál, ita-nia foho kmanek no istória sira, maibé mós ita-nia toleransia, no sosiedade abranjente ne'ebé halo illa ne'e sai fatin hakmatek no armonia iha diversidade.

Parseria ho viziñu no maluk sira, besik no dook, ita hotu bele haksolok ho progresu to'o ohin loron ... ita harii ona demokrasia ida-ne'ebé funsiona ho di'ak, ita iha mídia ne'ebé livre, no sosiedade sívil ne'ebé la-kontroladu, nasaun ne'ebé iha dame, povu sira rekonsiliadu, kanek sira husi konflitu pasadu mairoia kura ona.

Iha parte seluk, dalaruma ita la-sempre establese ita-nia prioridade ho loloos, ita la-sempre investe ho matenek no sufisientemente ba buat ne'ebé ita hotu tenke valoriza liu, mak ita-nia inan no bebé sira.

Sua Exelénsia Primeiru-Ministru Taur Matan Ruak,
Exelénsia Ministru sira,
Embaixador,

Representante Ajénsia ONU sira
No organizaun sosiedade sívil
Señor no señora sira

Iha ita-nia aniversáriu independénsia ba dala 20, ita tenke celebra duni progresu ne'ebé ita halo ona to'o agora, maibé ho aten-brani no haraik-an, ami mós tenke refleta ami-nia faillansu. No "ami" ha'u refere ba ami lider Timoroan sira iha tempu hotu-hotu, oinsá ita falla ba inan no oan sira iha nasaun ida-ne'e.

Ita tenke husu ita nia-an oinsá aniversáriu independénsia ba dala 20, nasaun ida-ne'ebé ho rekursu financeiru adekua ne'ebé razoavel, iha metade husi ninia labarik sira moris iha liña pobreza nia okos (liu ema adultu sira), nasaun ida-ne'ebé iha mortalidade neonatál ás liu iha rejiaun, no nasaun ne'ebé kada labarik daruak sofre malnutrisaun, nu'udar taxa malnutrisaun ne'ebé ás datoluk iha mundu. Ida-ne'e simplesmente la-asetavel.

Ita investe maka'as iha eletrisidade ne'ebé agora asesu ona husi ita-nia povu 96.1%, ita investe ona iha estrada nasionál no estrada rurál, ita investe iha Kapital Umanu. Desde tinan 2002, médiu esperansa moris aumenta ba tinan 10 liu. Iha 2002 ita iha doutór Timoroan nain 20, ohin loron ita iha ona doutór liu 1100.

Maibe tansá mak kompete ba dezvoltimentu ita husik hela ita-nia oan no inan sira iha kotuk.

Sira-nia nesesidade no kuidadu husi ita, nu'udar lider no ema ne'ebé foti desizaun polítika iha nasaun ida-ne'e, kuaze hanesan reflesaun ida liga ba aprovasaun legislasaun ne'ebé nesesáriu, no aloka orsamentu governu ne'ebé adekua ba populasaun 42% iha nasaun ida-ne'e - mak ita-nia oan sira.

Ha'u-nia apelu ba ami-nia Governu, Parlamentu no Parseiru Dezvoltimentu mai ita serbisu hamutuk, hotu-hotu sein exesaun, Governu no Opozisaun, lider Igreja Katólíka no relijiaun sira seluk, setór privadu, sosiedade sívil, xefe suku, atu iha Timor-Leste ida-ne'ebé laiha tan bebé mate bainhira moris, no ida-ne'ebé labarik hotu-hotu saudável, nutrisaun di'ak, aprende no seguru.

Atu atinji vizaun ida-ne'e, ha'u rekomenda ba ita-nia governu no parseiru dezvoltimentu sira atu iha alvu ne'ebé konsentradu ba prioridade rua:

Prioridade dahuluk atu redús malnutrisaun ba labarik, liuliu iha loron 1000 dahuluk entre konsepsaun (bebé iha knotak) to'o bebé sira halo tinan daruak. Ita hotu tenke hatene katak, hafoin labarik halo ona tinan rua, kuaze imposivel atu revertete efetu malnutrisaun.

Fó-susubeen inan ba bebé diminui alarmante no ida-ne'e tanba ignoransia no promosaun susubeen formula ne'ebé laiha moral. Ha'u husu ba governu atu urujentemente adota kódigu OMS susubeen inan nian ne'ebé keleur ona iha Ministériu Saúde to'o kuaze dékada ida. Kombinasan husi pobreza, ignoransia no promosaun komersial susubeen formula artifisial hola papel kritical ba prevalénsia raes-badak ne'ebé akontese ba ita-nia oan sira.

Prioridade daruak mak atu fornese asesu ba edukasaun pre-eskolar ba labarik hotu-hotu— atu harii baze ne'ebé forte ba ita-nia oan sira atu nune'e sira bele atinji sira-nia dezvoltimentu pontensial tomak, labele para eskola, no remata sira-nia estudu.

Permite ha'u atu esplika tansá mak ha'u hili área rua ne'e hanesan ha'u-nia prioridade prezidensiál ne'ebé prinsipál.

Dahuluk, hanesan ita hotu hatene katak, kuaze metade labarik timoroan sira malnutrisaun no tan ne'e:

Sira iha possibilidade ba risku atu mate dala 4

Sira nia dezvoltimentu kakutak la-di'ak

Sira iha risku atu moras hela de'it tanba sira-nia imunidade fraku

Sira iha possibilidade atu la kompleta sira-nia edukasaun, tanba sira nia IQ no abilidade kognitivu menus,

Sira iha possibilidade liu atu hetan rendimentu ki'ik.

Ida-ne'e signífika katak se ita la halo buatruma agora, possibilidade metade husi ita-nia futuru jerasaun sei lakon leet de'it. Ita sei laiha 'kapital umanu' ne'ebé persija atu dezenvolve nasaun ida-ne'e, atu halo serbisu, atu hahú negósiu, no atu kontribui ba dezenvolvimentu ekonomia iha Timor-Leste.

Ha'u-nia prioridade daruak mak atu asegura katak labarik tinan 3 to'o 5 inskreve iha pre-eskolar. Ida-ne'e, importante tanba iha tinan lima dahuluk, koneksaun neural liu miliaun ida mak forma kada segudus - ritmu ida-ne'ebé nunka bele repete fali iha ita-nia moris.

Labarik ninia kualidade esperiéncia dahuluk halo diferensia ne'ebé krítiku bainhira sira-nia kakutak dezenvolve, bele fornese baze ne'ebé forte ka fraku ba aprendizajen no komportamentu iha sira-nia moris tomak.

Dadaun ne'e, labarik timoroan 75% sira la atende pre-eskolar. Labarik tinan lima mai kraik 56% ninia saúde, aprendizajen no bem-estar psikososial la la' o ho di'ak.

Ita la persija atu ba do'ok hodi hatene ezemplu husi nasaun susesu sira, ne'ebé investe iha saúde no edukasaun ba labarik sira no agora aproveita retornu ba sira-nia investimentu. Ezemplu, Korea do Sul.

Korea do Sul atinji susesu ne'ebé notavel iha kombinasan entre kresimentu ekonomia ne'ebé lalais no redusaun pobreza ne'ebé signifikante. Atinjimentu nasaun nian ne'e impresionante tebes, bainhira ita konsidera katak menus husi 25% husi sira-nia rai (nasaun) mak uza ba agrikultura ka atividade ekonomia seluk no Korea do Sul iha rekursu natural ne'ebé limitadu tebes. Hanesan mós ho Timor-Leste, Korea do Sul iha esperiéncia funu sívil ne'ebé estraga maioria infraestrutura. Atinjimentu prinsipál ida husi governu Korea iha 1950s mak eradikasaun analfabetismu liuhusi ekspansan instituisan edukasaun ho lalais.

Nu'udar konklusaun, permite ha'u rekomenda pasu prátiiku 2 atu reverta situasaun terivel labarik timoroan sira nian no atinji ha'u-nia vizaun:

Ida, governu tenke aloka orsamentu liután atu kombat malnutrisan ba labarik sira iha setór nutrisan tomak.

Ha'u kongratula Primeiru Ministru ne'ebé foin lalais lansa ona "Planu Estratéjiku Nasionál Setór Saúde ba 2022 – 2026". Agora Gabinete Primeiru Ministru no Ministriu Saúde tenke asegura katak iha alokasan orsamentu ba implementasan Planu Estratéjiku ida-ne'e.

Ha'u mós rekomenda ba Ministriu Saúde atu konsidera hodi estabele Diresan Nasionál Nutrisan iha Ministriu atu progresa agenda nutrisan ba nivel ne'ebé loos. Ha'u mós nomeia tiha ona asesor ba nutrisan no seguransa ai-han atu apoiu objetivu ida-ne'e.

Daruak, suku ida-idak tenke iha pre-eskolar. Ha'u hatene katak ajénsia ONU ho susesu pilotu ona modelu ne'ebé kustu efetivu hanesan pre-eskolar komunitária

Ministriu Edukasan tenke atinji matríkula 100% ba labarik sira iha pre-eskolar iha nasaun tomak.

Permite ha'u uza oportunidade ida-ne'e atu fahe mós katak pasu dahuluk ba asaun ida-ne'e mak ha'u sei lansa modelu pre-eskolar iha Palásiu Prezidensiál. Ha'u mós husu ona ba ha'u-nia ekipa atu estabele Grupu Dezenvolvimentu Infánsia nian, ne'ebé sei lidera husi Gabinete Prezidente, ida-ne'ebé sei envolve liña ministeriál hotu-hotu, parseiru dezenvolvimentu no organizasan sosiedade sívil.

Ha'u fiar katak parseiru dezenvolvimentu hotu-hotu mak prezensa iha ne'e, no governu Timor-Leste, sei suporta ha'u-nia vizaun atu iha Timor-Leste ida-ne'ebé laiha tan bebé mate bainhira moris, no ida-ne'ebé labarik hotu-hotu saudável, nutrisan di'ak, aprende no seguru.

Ha'u promote katak ha'u sei halo buat hotu ho poder no kapasidade ne'ebé ha'u iha hodi apoia imi iha esforsu ida-ne'e.

Ha'u-nia obrigado.